

## LU ZZU PEPPI LU RICIA

Lu zzu peppi lu ricia  
nun lu vinnu lu me sceccu  
'stu governu nni babbia  
e mi tocca fari 'u beccu.  
Poi l'annata vinni bbona  
cu li stipi attimpagnati  
l'abbunanza spissu sprona  
s'adequau a la civiltati.  
Si vinniu lu sciccareddru  
pi du' sordi a un chistianeddru  
s'accattau lu topolinu  
cu li sordi di lu vinu.  
La so' casa 'n vicchiariata  
la lassau cu so' mughieri  
si canciau la so' pinnata  
si nni jiu 'n casa a luveri.  
L'abbelliu tutta la casa  
la pittau culuri rosa  
e a lu postu di lu lumi  
un lampadariu tac e addumi.  
Cu lu scontu di la Sippi  
vosi addivintari Vippi  
e 'u telefonu a curnetta  
lu zzu Peppi misi 'n fretta.  
Cu li sordi d''a pinsioni  
s'accattau 'a televisioni  
e ogni cosa chi spuntava  
lu zzu Peppi l'accattava.

Focu a ligna surpassatu  
s'affumava lu stufatu  
e seguennu 'a nova prassi  
provvediu c"u pipigassi.  
Chiù lu pani 'un si facia  
s'accattava a la putia  
lu zzu Peppi ormai 'mportanti  
jia a manciari ô ristoranti.  
Beddru tempu si durassi  
lu zzu Peppi jia ricennu  
ma a la stati comu prassi  
seguì subbitu lu mmernu.  
Si sinteru 'i primi trona  
cu lu sciopiru d"u pani  
e a cu cci finiu bbona  
stesi addiunu comu un cani.  
Chiuviu roppu a celu apertu  
cci fu puru l'alluvioni  
e a pariri d'ogni espertu  
'un abbastavanu milioni.  
Aumentau prestu 'a binzina  
deci liri accittabbili  
si caminau comu prima  
nun patiu l'automobbili.  
Lu zzu peppi 'nna 'stu 'ngannu  
pi usari lu topolino  
a cunti fatti 'n'ogni annu  
cci pirdia 'na vutti vinu.  
Poi lu vinu cci calau  
lu telefonu aumentau

e seguennu cu 'sta prassi  
tuttu 'u vinu pi li tassi.  
Cci fu poi lu terremotu  
nna Sicilia nno Bilici  
autri sordi avemu coto  
e 'un si sa chi si nni fici.  
Aumentau arrè 'a binzina  
aumentau puru 'a correnti  
ogni sira, ogni matina  
una catasta d'aumenti.  
Fattu 'u cuntutu finu finu  
tra bulletti e topolinu  
lu varagnu di 'n'annata  
era 'u vinu r" a cannata.  
Nun putennu jiri avanti  
a l'arrivu d" a bulletta  
nun pacannu su l'istanti  
cci tagghiaru la spinetta.  
Comu a Cristu misu 'n cruce  
senza sordi pi manciari  
cci tagghiaru puru 'a luci  
nun putennula pacari.  
Prestu prestu fu sfrattatu  
traslocau cu so' muggheri  
vinni puru denunziatu  
nun pacannu lu luveri.  
Riturnau na la pinnata  
senza sceccu nè carrettu  
e davanti la cannata  
si battia li pugna 'n pettu.

Poi arrivau la malannata  
e fu pecura scannata  
oramai l'ultimu aiutu  
era aviri 'u contribbutu.  
'N'istanza 'ncartabullata  
seguiu roppu 'a malannata  
e roppu un misi ri lotta  
cci rettiru 'na pagnotta  
Tutti 'i sordi r" a spittanza  
ficiru la cuntrananza  
curpevuli 'na stangata  
peggiu assai ra malannata.  
Lu so'cori 'un risistiu  
veru tinta cci finiu  
e tra tantu straziu e chiantu  
jiu a finiri ô campusantu.  
Na la petra lapidali  
lu zzu Peppi vosi scrittu  
'sti paroli soi immortali  
tistamentu d'omu afflittu  
" Nun vinniti mai lu sceccu  
s'un vuliti fari 'u beccu  
vi lu rici lu zzu Pinu  
chi 'u canciau c"u topolinu

## ANNUNCI

Estetista scippa pila  
cu clienti 'n doppia fila  
cerca un sociu sottopostu  
chi cci metti 'u pilu a postu

Ragionieri chi fa affari  
senza tantu arraggiunari  
va circannu amanti 'n coppia  
pi la sua partita doppia

Custureri raffinatu  
va cu culu so' sciratu  
cerca giuvini all'altezza  
pi mittirici 'na pezza

Signurina munciuniata  
roppu d'essiri stirata  
cerca amanti stoccafissu  
pi stirarisi chiù spissu

Antiquariu pezzi rari  
risiedeva a centru Bari  
ora residenti a Cerda  
colleziona pezzi merda

Avvocatù causi lenti  
sempri a curtu ri clienti  
pi putiri jiri avanti  
cerca un paru ri tiranti

Signurina prezzu affari  
milli euru pi taliari  
poi pi fari un passu avanti  
euru milli e nautri tanti

Collaudata cammarera  
quasi a fini ri carrera  
cerca vecchi pi serviziu  
e' disposta a ghiri ô spiziu

Barunazzu d'altu rangu  
'nnuminatu re ri fangu  
cerca casta barunissa  
pi 'nfangari puru ad issa

Munacheddru naturista  
puru monacu Buddista  
cerca monaca baggiana  
bbona puru s'è Buddana.

Musicista ri Milanu  
sona Bach cu 'na manu  
cerca musici allenati  
pi sunari Bach-arati

Vicchiareddra pocu arzilla  
tutta broru e camomilla  
va circannu un giovinottu  
pi cci fari panicottu

Giovinottu tuttu fari  
addestratu pi cunzari  
cerca donna altulucata  
bbona puru s'è scassata

Un pitturi pitta nuru  
viri niuru lu futuru  
cerca vecchia puru storta  
pi pittar natura morta

## CANTU

Cantu 'sta terra di limiuna e citra  
'nfangata d'omini 'mpusturi,  
cantu pi raggia,  
cantu p'amuri.  
' N'amuri ormai a la deriva  
na 'na nuttata  
chi di luna è priva.  
Cantu pi putirmi orizzuntari,  
bussula pi 'na varca  
'mezzu 'u mari.  
Cantu l'amuri  
di n'amicu persu  
chi di scurdarimillu nun c'è versu.  
Cantu na nenia di dulura 'ntrisa,  
cu l'occhi a pampineddra.  
Cantu pi 'mprise.  
Cantu 'sta maliritta terra!  
Circavu paci  
cc'attruvai la verra!  
Cantu stunatu  
e puru senza vuci,  
pi putiri supputari la me cruci.  
Cantu senza farimi priari  
anchi si lu fazzu  
sulu pi cantari.  
Na lu cantu cercu lu cunfortu  
pi chissu cantu  
e roppu mi cunortu.



Cantu comu un passaru e un cardidru  
picchè mi sentu d'essiri n'aceddru  
cantu comu quann'eru picciridru  
facennu sulu cri comu l'ariddu.

Cantu puru  
pi quannu 'un cantu cchiù  
e poi  
Puisia mia mi canti tu.

## CONVALISCENZA

Sulu 'na ciaciatina,  
chi nun smovi foggia,  
'nna st'autunnu  
di riposu furzatu.  
'Na taliata amurevuli  
accompagna  
'na sfilazza di luci,  
cura d'un suli calanti,  
chi m'accarizza  
'u capizzu di lu lettu.  
Matri primurusa!  
Miricina chi cura  
lu spiritu!  
Vulissi arrubbari  
l'ali a 'na farfalla  
pi vulari ,  
oltri la grara  
di 'sta sala d'aspettu;  
pi ghiri a taliari  
'nna l'occhi  
e 'nterrogari 'st'amicu  
chi m'accompagna.  
Vulissi sapiri,  
'nna 'stu caminu  
dubbiusu ,  
lastricatu  
di spaventu e di spiranza,  
quali strata pigghiari.

Quanti riordi  
tornanu  
'nna me menti  
pi sippilliri  
sonnura  
di picciriddu giujusu.  
La svintura  
di tanti spiranzi svanuti  
mi fa cogghiri  
lu veru sensu di la vita:  
amuri e suffirenza.  
'Na visioni amica,  
roppu,  
alluntana  
'u scantu  
di malummiri  
minacciusi.

## SCURU

Rintra 'na 'rutta,  
'n funnu a 'na pirrera  
un ciumi scurri,  
cerca lu so' mari.  
'Na petra abballa  
cca e ddra sbattennu,  
s'allena,  
facennu scrusciu  
sulu a malappena.  
Mannu 'na vuci  
e m'arritorna lesta.  
Caminu,  
ma nun trovu lu caminu,  
vulissi curriri,  
vulissi sbattuliari  
comu lu ciumi  
truvati lu me mari.  
Lu cori afflittu  
mi fa tantu piniari  
e viriri nun viu  
mancu a tantiari.

## ME CUMPARI

Me cumpari Niculinu  
latin loviri sbindatu  
vesti comu un figurinu  
e va sempri 'mpumatatu

Cerca giovini turisti  
pi putirsi avventurari  
e scanzari l'imprevisti  
di duvirsi maritari

L'altu jornu a Guidaloca  
agganciau na ran biunnazza  
cu la vuci anticchia roca  
c'addumanna la so' razza

Chiddra 'mbrogghia p'interessi  
mustra strana la liquera  
la so' tila bbona tessi  
e cci rici ch'è stranera

Me cumpari Niculinu  
'un cci viri chiù di l'occhi  
parla 'n modu sopraffinu  
e cci cunta du' 'mpapocchi

Da galanti cunzumatu  
la trascina un pocu arrassu  
trova un postu cantuniatu  
dunni po' pruvari 'u spassu

La biunnazza cosenzienti  
trova subbitu la posa  
poi cu fari 'mpertinenti  
c'addumanna si s''a sposa

Me cumpari appena chista  
cci minestra 'sta proposta  
si n'adduna chi 'a turista  
è na biunna fatta a posta

Nè Tedesca nè Francisa  
e nè mancu razza mista  
a Palermu nni la Zisa  
tanti e tanti l'hannu vista

Dici allura amica cara  
tornatinni ô to' paisi  
li turisti, d'ora 'mpara,  
chi ghiò cercu su francisi

Ma siccomu Niculinu  
già li manu s'allurdau  
vosi fari l'omu finu  
e pu scommirù 'a pacau.

## E' TUTTU SO' PATRI.....

Omini e donni spusati e divisi  
fannu l'amuri e si fannu prumisi  
eterna si giuranu la lialtà  
e chi farannu li figghi a mità.

Accussì iddri e dipoi puru niatri  
sannu di certu lu patri e la mati  
succeri però chi 'u pattu si spascia  
quannu la mati è granni bagascia

Quannu la donna va pi parturiri  
tutti 'i parenti cercanu scupriri  
la sumigghianza di lu picciriddu:  
"lu nasu certu è d"u patri r'iddru".

Taliannu bbonu poi 'u patri presenti  
virinu d'iddru chi 'un cci n'havi nenti  
forsi cci n'havi r" a parti r" a mati  
chi 'u nasu havi tali di lu patri.

'Stu nasu allura a nuddru arrisimigghia  
si mancu si cunfà cu l'otra figghia,  
e l'otra figghia 'un si cunfà cu patri:  
Buttana allura è la vera mati!

'Sta conclusioni è superficiali  
si 'nsiminata vinni artificiali  
c" a mora nova di tuttu si pò  
ti nasci un figghiu ed è di Totò

Si navigassi la natura a vista  
cci fussiru 'nuzzenti razza mista.  
'Stu figghiu comu 'u patri tali è  
anchi si 'u patri 'un si sapi cu è.



## Tempi moderni

'U latru fa lu latru pi misteri  
'u fissa si è fissa chi po' fari?  
Si po' fari circari na muggheri  
e n'otra fissa jiri a cunsumari

'Na malatia si po certu curari  
s'attrovi 'a miricina chi s'adatta  
'u fissa nasci fissa e 'un c'è chi fari  
cu nautra fissa fa lu pari e patta

Nuddru s''a mai pigghiatu lu pinzeri  
s''u statu salvaguardia a chissi rui  
chi pur essennu maritu e muggghieri  
fannu chi si unu scappa l'altu fui

Vurria diri, perciò, pigghiannuni attu  
ch' 'u munnu è assai malabbirsatu  
'un cci su sulu lu surci e lu gattu  
e lu gattu d''u cani assicutatu

Cu si rici cattolicu clementi  
cu di piccatu sulu pirdunatu  
cu si prufissa laicu penitenti  
e cu si sbota puru a l'altu latu

Lu munnu fattu è di varia genti  
tutti figghioli ri lu stissu Diu  
tutti chi pari 'un cci curpanu nenti  
ma quarcunu è figghiu ri schifiu

Cu havi 'na muggheri e si la teni  
cu è chi immeci fa lu lassa e pigghia  
cu fa lu fimminaru senza freni  
e cu va cerca na nova famigghia

Cu si rici cattolicu pintutu  
cu fa chiddru chi voli e si nni futti  
cu già ha surpassatu ed è curnutu  
crirennu chi poi Diu pirduna a tutti

'Stu munnu è veru malu cumminatu  
ma ognunu havi la so' cunvinenza  
cu pari castu havi già piccatu  
e duna 'ncapu a cu fa cunvivenza

Arrisumigghia tantu a un granni cessu  
dunni si fa la gara pi strunziari  
fimmini e fimmini ardinu lu stessu  
senza d'omini arnesi maniggiari

Si vonnu ponnu puru procreari  
basta aviri lu semi artificiali  
cu na siringa farsi 'nsiringari  
senza lu trasi e nesci naturali

'U patri sarà un omu virtuali  
'ncumpenzu cc'è du matri d'arurari  
comu du virgineddri tali e quali  
su' matri senza farsi snaturari

Omini e omini fannu puru sessu  
ricinu chi cci veni naturali  
la spinta cci la runa 'stu progressu  
dunni ogni cosa passa pi nurmali

Si tuttu 'u munnu è allura un cessu  
picchè semu a cu godi e cu pinà  
ramuci lu dirittu a tutti 'u stessu  
e ognunu scegli la so' giusta via

## NATALI D'AERI NATALI D'OGGI

Chiui di dumila anni fa  
lu primu Natali.  
Rintra na rutta nuru e cruru  
senza riscaldamentu  
lu primu divinu lamentu.  
La marunnuzza agghiagnatizza  
cu lu ciatu lu quariava  
lu sceccu a moru so l'aiutava  
e puru un toru,  
grossu tizzuni,  
faccia ri termosifuni.  
La genti ri tanti banni  
purtava chiddu ch'avia  
ricotta, tumazzu, pani friscu  
cipuddri, finocchi a 'nzalata  
e prestu prestu  
la taula era cunzata  
pi fari 'na 'ranni manciata.  
Poi tutti a fari preu e dari allegria ,  
cu qualchi ballu,  
e puru cu la quatrigghia,  
a la sacra famigghia.  
Si scummiraru picurara e saggi  
e ficiru li Maggi  
un longu caminu  
p'arurari lu bamminu  
e purtari in omaggiu  
oru, 'ncenzu e mirra.

Passaru trentatri anni  
e roppu tanti miraculi e affanni  
comu previstu  
fici la fini d'un poviru Cristu.  
Vulia rivelari  
chi puru 'i morti ponnu campari!  
Ora si ripeti 'stu ritu  
pi ricordari  
lu primu Natali,  
ma 'u picciriddu nasci  
na na stanza addubbata  
cu tanti riscaldamenti  
cu tanta genti  
pronti a regalari  
a stu bamminu,  
regali esaggerati  
e l'immancabili telefoninu.  
Poi tutti a sbafari,  
pi dumani riri:  
nun si po cchiù campari!  
'Stu Natali è 'nvintatu.  
Lu Signuruzzu è diminticatu.  
Mancanu li saggi  
e li novi Re  
portano:  
coca ,birra,  
canni e cafè.  
Ma chistu chi Natali è?

## Riccillu tu ch'e Natali!

Vecchi, 'ranni e picciriddri  
'n celu puntanu li stiddri  
nna 'sta notti scura scura  
cc'è 'na stiddra cu la cura  
    Signa 'u Nicu appena natu  
    e Natali è passatu  
    poi la stiddra cu la cura  
    s'alluntana cu primura

'mezzu 'i strati , ne' lucali  
si festeggia lu Natali

Ma Natali 'un è pi tutti  
cci su' verri cci su lutti,  
e cu sta davveru mali  
nun s'adduna ch'è Natali!  
    A cu manca 'na dimura  
    e di notti fora scura  
    strati strati, ne' canali  
    riccillu tu ch'e Natali!

A cu' 'a verra maliritta  
cci livau puru 'a birritta  
e 'a firita cci fa mali,  
riccillu tu ch'e Natali  
    'Stu Natali è tantu stranu  
    e ti porta manu manu  
    nn'ô Burundi, nn'ô Zaïri  
    dunni Natali nun si viri

Stissa cosa, 'nno Sudanni  
'nna l'Iracchi tuttu danni,  
dunni 'a verra sta pi paci  
ed ognunu chianci e taci.

Vecchi, ranni e picciriddri  
nun talianu cchiù li stiddri  
ddra la sira appena scura  
ogni stiddra è senza cura

L'occhi tennu sbarrachiatu  
comu fussiru spirtati;  
cc'è la morti appena giri  
nun si senti, ma si viri.

Megghiu campanu l'armali!  
Ricillu tu ch'e Natali!

Talia, 'u munnu emancipatu  
chi 'sti mali ha creatu,  
vivi 'mezzu 'sta lurdura  
gira ô largu e nun si cura.

Comu ê Maggi, lemmi lemmi  
si riversa a Bettilemmi  
trova nuru un picciriddu,  
lu talia, rici:<< 'un è Iddru!>>

Poi fa 'a cosa cchiù banali;  
si festeggia lu Natali!

## FIGGHI.....PERSI

Un populu di addottrinati  
duttura, ragioneri, avvocati:  
Altulucati e puru puvireddri.

La scienza abbunna,  
di titulati un'unna,  
ch'addumannanu 'n coru  
pani e lavoru.

'U titulu ci l'hannu  
ma chi si nni fannu?

Li nostri regnanti  
copiaru 'u re d'aeri  
chi un populu d'affamati  
li fici addivintari nubiltati.

A scaccia peri, a scaccia peri  
li nnuminau tutti cavaleri,  
accussì ogni fissaria  
cci passava 'n cavallaria.

Fu 'na riforma  
senza sustanza  
si jinchìu la vucca  
ma patìu la panza.

Lu essiri cavaleri  
nun li tenia 'n peri.  
Stiornu comu aeri.

Poi, roppu laureati  
tutti "masterizzati",  
disoccupati.

Passa un misi,



passa un annu,  
la beffa roppu 'u dannu!  
Cercanu di farisi avanti  
ma ogni parola  
è na vuci vacanti.  
Di fari nun cc'è nenti!  
A trent'anni  
s'emigra 'n continenti  
o oltri mari  
sulu pi travagghiari.  
Qualchi sirvizzu a rati,  
stiornu si, dumani no  
'u tempu passa  
sulu co.co.co.  
La vita è 'mpossibili  
c'un travagghiu flessibbili.  
Sistimati?  
Mancu a pirati!  
Lu patri arresta ri stuccu!  
Era megghiu un figghiu  
mezzu mammaluccu!  
Immecì prumittia  
e scelsi la so via.  
C'un timbru ri statu:  
lauriatu!  
Munnu 'nsinsatu,  
un figghiu arrubbatu!  
Torna ogni tantu  
pi facci faria  
na la casa dunni si pinìa.

Poi si nni va,  
triunfa la stranìa.  
Va cerca furtuna  
tuppuliannu purtuna,  
chi trova abbanniddruzza.  
Puru essennu espertu  
mai un purtuni apertu!  
Ormai nun torna cchiù!  
“Chi vegnu a fari?  
A moriri ri fami?  
Cca , almenu ogni tanticchia,  
un piattu ri linticchia  
lu trovu.  
E si nun lu trovu  
quantu menu cci provu.”  
Comu Edom<sup>(1)</sup> traruti,  
li patri chiancinu  
‘sti figghi sbinnuti,  
ratisi a la latitanza,  
cu l’abbonè e abbonè  
soccu s’accanza!  
Vannu nall’aria  
li sentimenti.  
Pi nenti!  
Patri e patri  
chi spaddri riversi  
stanchi ri piniari  
s’hannu a cuitari.  
Figghi ....persi!

(1) Soprannome di Esaù

## SITI DANNATA

L'acqua cari ri 'ncelu a buluni  
supra li terri da anni assitati.  
Acqua chiovi chi ghinchi quartari,  
e si perdi in quartari ciaccati.  
Ah , sapissi cunzari quartari!  
Mi cunzassi la mia ch'è ciaccata,  
la rijinchissi ri acqua piuvana  
e 'un patissi 'sta siti dannata.  
Cu' 'sta manna caruta ri 'ncelu  
vivi l'olivu, 'u piru e lu melu  
vivinu anchi l'armali assitati  
e trippianu a tistali livati  
'mezzu terri chi sunnu rinati.  
Jò p'aviri 'a quartara ciaccata  
soffru ancora 'sta siti dannata.

## MARETAMU

Coccu ri cira  
chi lu Signuri squagghiau  
'mezzu l'immensu mari  
pi farlu priari ri paci.  
Quattru casi mali fatti  
chi lu suli 'nna staciuni abbrucia  
e lu ventu vulissi abbattiri  
quannu ciucia.  
Facci scavati  
da lu marusu di lu sururi  
e tantu amuri.  
L'omini cu li varchi  
'stati e 'mmernu  
lauranu lu mari;  
siminanu riti  
e arricogghinu pisci,  
siminanu riti  
e arricogghinu pisci,  
siminanu riti  
e arricogghinu pisci.  
Cogghinu scantu  
di tantu in tantu  
muvennusi 'nna sta granni cisterna;  
a mari 'un cci nn'è taverna!  
Li fimmini aspettanu la quinta  
pi putiri sazzari  
lu beni di l'omu di lu mari  
e ogni vota,

quasi a scattafeli,  
è 'na luna di meli.  
Li picciriddri  
criscinu 'mezzu li varchi.  
li pisci e li rizzi  
e 'un hannu vizzi,  
però hannu a' emigrari  
si vonnu sturiari,  
e la granni passiuni  
è chiddra di lu mari.  
Li matri  
l'affidanu sicuri,  
priannu lu signuri  
chi quannu criau lu paraddisu  
taliau Maretamu  
e fici un surrisu.

## RARICA

Muntagna nnimica!  
Quantu fatica  
pi stari addritta!  
Li mazzacani  
facianu ruzzuliuna  
'nn'ôn lettu ri fangu;  
ora 'mmistianu,  
ora scanzavanu,  
facennu sempri dannu.  
Arvulu anticu di marmu.  
Appirantatu fermu.  
Poi,  
ciuciau maistralazzu.  
Li fogghi,  
ascippati comu pila,  
a una a una,  
facianu ruzzuliuna,  
'mezzu la terra,  
rintra li vaddruna.  
Li vrazza,  
sturciuti  
e poi ascippati,  
erano di 'mpirimentu  
'mezzu li strati.  
Sulu 'u fustu risistiu,  
poi ..... ciriu.  
Comu s'un fussi mai natu  
arvulu d''u me passatu,

disiridatu,  
senza cchiù ciatu  
e malu cumminatu.  
Senza fogghi.  
Senza vrazza.  
Senza fustu.  
Sulu a rarica  
è ferma.  
Rarica antica,  
eterna.